

МАЯ В 9-Й ДЕНЬ

ИЖЕ ВО СВЯТЫХ ОТЦА НАШЕГО НИКОЛАЯ АРХИЕПИСКОПА,

МИР ЛИКИЙСКИХ ЧУДОТВОРЦА

НА ВЕЧЕРНИ

Поем: Блажен муж: 1-й антифон. На Господи, воззвах: стихиры праздника 3 и святого 5, глас 8.

Подобен: На Небо текущее:

На небо добродетелей возшед превысоких, * чудотворец явился еси в Мирех, славне: * телом в Баре почивая, * духом везде верныя посещаеши * и вся от бед изымаеши, * достойно честь приемля, * во святителех прославляеши, * Христов угодниче блаженне. * Тя ныне молебно призывающе, * умильно глаголем: * помолися, святителю Николае, Спасу всех * умирить мир и спасти души наша.

Молебными песнями, сошедшеся, празднующи, * нашего заступника честное пренесение радостно восхвалим, * иже вся страны просвещает чудесы * и скорбящая божественно утешает, * обидимыя избавляет, * иже милостынею Бога одолжи * и того ради прият стократное воздаяние. * К нему же вси мы взываем: * помолися, святителю Николае, Спасу всех * умирить мир и спасти души наша.

Ангельская жилища достиг добродетельми, * предстоиши Владыце твоему Христу, * Ему же раб благопокорив был еси, * и от раки миро точиши, * верным пособствуя чудесы твоими * и к Богу приводя благочестивыя. * Не от Бара ныне призываем тя, * но от горнего Иерусалима, * идеже радостно ликуеши со апостолами, и пророки, и святители: * помолися, Богоносе Николае, Спасу всех * умирить мир и спасти души наша.

Слава, глас 6:

Святителей удобрение * и отцев славу, * источника чудес и верных заступника великаго, * сошедшеся, о празднующи, * песенными похвалами воспоем, глаголюще: * радуйся, мирянов хранителю, * и первоседателю честный, и столпе неподвижимый. * Радуйся, светильниче всесветлый, * иже мирския концы просвещая чудесы. * Радуйся, скорбящих Божественная радости * и обидимых теплый предстателю. * И ныне, всеблаженне Николае, * не престай моляся Христу Богу * о верою и любовию чтущих приснорадостную * и всепразднственную память твою.

И ныне, праздника.

Вход. Прокимен дне и чтения.

Притчей чтение (главы 10 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведет разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава, от уст ея исходит правда, закон же и милость на языке носит. Послушайте убо мене, о чада! честная бо реку, и блажен человек, иже пути моя сохранит, исходи бо мои исходи живота и уготовляется хотение от Господа. Сего ради молю вас и предлагаю мой глас сыновом человеческим, яко аз, премудрость, устрой совет, и разум, и смысл аз призвах. Мой

совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобивии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Притчей чтение (главы 10 и 11):

Уста праведнаго капают премудрость, язык же неправеднаго погибнет. Устне мужей праведных капают благодати, уста же нечестивых развращаются. Мерила льстивая мерзость пред Господем, вес же праведен приятен Ему. Идеже аще видет досаждение, тамо и безчестие, уста же смиренных поучаются премудрости. Совершение правых наставит их, и поползновение отрицающихся упасет их. Не пользуются имения в день ярости, правда же избавит от смерти. Умер праведный, остави раскаяние, наручна же бывает и посмеятельна нечестивых пагуба. Правда непорочнаго исправляет пути, в нечестие же падает неправда. Правда мужей правых избавит их, безсоветием же пленяются беззаконнии. Скончавшуся мужу праведну, не погибнет надежда, похвала же нечестивых погибнет. Праведник от лова убежит, в негоже место предается нечестивый. Во устех нечестивых сеть гражданам, чувство же праведных благоспешное. Во благих праведных исправится град, и в погибели нечестивых радование. Во благословении правых возвысится град, усты же нечестивых раскопается. Ругается гражданином лишенный разума, муж же мудрый безмолвие водит.

Премудрости Соломони чтение (глава 4):

Праведник аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть и живый посреде грешник преставлен бысть, восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеву душа его, сего ради потщася от среды лукавствия. Людие же видевшие, и не разумевшие, ниже положише в помышлении таковое, яко благодать и милость в преподобных Его, и посещение во избранных Его.

На литии стихиры самогласны, глас 2:

Отче Николае, * аще и Мирская страна молчит, * но мир весь, иже тобою просвещенный, * мира же благоухании и чудес множеством * взывает благохвальными песньми, * и спасшиися тобою осужденнии * с сущими в Мирех, и мы, поюще, вопием: * моли спастися душам нашим.

Глас 4:

Отче Николае, * Пресвятаго Духа мироположница сый, * яко в Мирех благоухаеши Божественными ароматы, * Христовым бо апостолом подобник быв, * вселенную обходиши словесы чудес твоих. * Темже и дальным, яко близ, во сне являясь, * от смерти избавляеши, * иже неправедным судом умрети имущия, * спасая преславно от бед многих призывающия тя. * Темже и нас от находящих лютых * свободи твоими молитвами, * присно восхваляющих тя.

Глас 8:

Доблестей твоих, преподобне отче, плод * просветил есть верных сердца: * кто бо слыша безмерное твое смирение * и терпению не удивися, * яже к нищим тихости, * к скорбящим утешению? * Вся боголепно научил еси, * святителю Николае, * и ныне неувядаемым венцем увязался еси, * молися о душах наших.

На хвалу потекл еси Господню, Николае, * во временней жизни, * и Той ты прослави на Небесней и истинней жизни. * Темже, дерзновение стяжав к Нему, * моли спасти души наша.

Слава, глас 6:

Благий рабе верный, * делателю винограда Христова, * ты и тяготу дневную понесл еси, * ты и данный ти талант возрастил еси * и по тебе пришедшим не завидел еси. * Темже врата Небесная отверзошася тебе, * вниди в радость Господа твоего * и моли о нас, святе Николае.

И ныне, праздника.

На стиховне стихиры глас 4.

Подобен: Яко добля:

Звезду незаходимую всесветлаго солнца, * небо духовное, * поведающее славу Божию спасительную, * Божественного проповедника, просвещника языком, * реку, изливающую воды разума * и напаяющую верных сердца, * да ублажим Николая, преславного святителя.

Стих: Честна пред Господем * смерть преподобных Его.

Морем, святителю, быша шествия твоя * из Мир Ликийских в Бар град: * взялся бо от гроба ковчег твой * и к западом дойде от востока, * благочестно последовавшим монахом, * иже при гробе твоём честь ти творившим, * мановением Владыки всех, * Николае преславне.

Стих: Священницы Твои облукются в правду, * и преподобнии Твои возрадуются.

Кораблеплаванием ти, воду блаженну содея, * и, ко граду Бару пришед, * миро источил еси, славне, * и, страсти неисцельныя исцеляя, * ту сущим был еси прибежище, * и заступник, и избавитель, * ко всех Царю и Спасу моляся, * Николае святителю.

Слава, глас 6. Самогласен:

Человече Божий * и верный рабе, * слуго Господень, * мужу желаний, * сосуде избранный, * столпе и утверждение Церкви, * Царствия наследниче, * не премолчи, вопия за ны ко Господу.

И ныне, праздника.

Тропарь, глас 4:

Приспе день светлаго торжества, * град Барский радуется, * и с ним вселенная вся ликовствует * песнями и пеньми духовными: * днесь бо священное торжество * в пренесение честных и многоцелебных мощей * святителя и чудотворца Николая, * якоже солнце незаходимое, возсия светозарными лучами, * разгоняя тьму искушений же и бед * от вопиющих верно: * спасай нас, яко предстатель наш великий, Николае.

Ин тропарь, глас тойже:

Отечество свое, Миры Ликийския, не оставь духом, * во премирный град Барский преславно телом пренесея, архиерею Николае. * И оттуду множество человеческое своим пришествием возвеселил еси * и болящия исцелил еси. * Темже ты молим, святителю Николае, * моли Христа Бога, * да спасет души наша.

Слава, и ныне, праздника.

НА УТРЕНИ

На Бог Господь: тропарь праздника и святого.

По 1-й стихологии седален праздника, дважды.

По 2-й стихологии седален святителя, глас 4.

Подобен: Удивися:

Удивил еси, Владыко, святителя Твоего во странах, * подав ему чудес благодать недуги различныя от человек отгоняти * и сущия во узах избавляти, * обидимыя же от лютых изымати. * Емуже молебнo вопием: * святой Николае, избави нас от враг наших.

Слава, и ныне, праздника или Богородичен:

Нечистых помышлений моих множества * и безместных мыслей обуревания кто изрещи может, Пренепорочная? * Настояния же безплотных враг моих и сих злобу кто исповесть? * Но Твоею мольбою, Благая, сих ми всех избавление даруй.

По полиелеи седален, глас 1.

Подобен: Гроб Твой:

Освятц себе житием совершенным, явился еси святитель Бога Вышнего, * от Негоже укрепляемь, еретичествующих уста заградил еси. * Тем твое пренесение светло празднуем, Христа Бога величающе.

Слава, и ныне, праздника или Богородичен:

Безвестная Чистая Богородице Дево, едина верных предстательство и покрове, * бед, и скорбей, и лютых обстояний всех избави, * на Тя упование, Отроковице, имущих, * и души наша спаси Божественными мольбами Твоими.

Степенна, 1-й антифон 4-го гласа.

Прокимен, глас 4: Честна пред Господем * смерть преподобных Его.

Стих: Что воздам Господеву о всех, яже воздаде ми?

Всякое дыхание:

Евангелие от Иоанна, зачало 35, от полу.

Рече Господь ко пришедшим к Нему иудеем: аминь, аминь глаголю вам, не входяй дверьми во двор овчий, но прелазя инуде, той тать есть и разбойник. А входяй дверьми пастырь есть овцам. Сему дверник отверзает, и овцы глас его слышат, и своя овцы глашает по имени, и изгонит их. И егда своя овцы ижденет, пред ними ходит, и овцы по нем идут, яко ведут глас его. По чуждем же не идут, но бежат от него, яко не знают чуждаго гласа. Сию притчу рече им Иисус, они же не разумеша, что бяше, яже глаголаше им. Рече же паки им Иисус: аминь, аминь глаголю вам, яко Аз есмь дверь овцам. Вси, елико их прииде прежде Мене, татие суть и разбойницы, но не послушаша их овцы. Аз есмь дверь, Мною аще кто внидет, спасется, и внидет и изыдет, и пажить обрящет.

По 50-м псалме стихира, глас 6:

Наследниче Божий, сопричастниче Христов, * служителю Господень, святе Николае, * по имени твоему тако и житие твое: * спросия бо седине разум, * свидетельствоваше светлость лица твоего душевное незлобие, * извествоваше кротость Слова молчаливое. * Жизнь твоя славна, * и успение со святыми, * моли о душах наших.

Канон праздника со ирмосом на 6. И святого на 8. Канон святого, глас 8.

Песнь 1

Ирмос: Песнь возснем, людие, * чудному Богу нашему, * свободившему Израиля от работы, * песнь победную поюще и вопиюще: * поим Тебе, единому Владыце.

Песнь устен моих приими, Благодателю Христе, и уясни ми язык, не поминая многих моих грехов, да воспою честное житие Твоего святителя в память пренесения мощей его.

Чудотворный дар прием и терпения венцы, святительством украшаяся, Богу помолися, отче, прегрешений прощение даровати нам, славящим твое пренесение.

Пастырь Христова стада, отче, иным овцам посылаешися, к латинскому языку, да вся удивиши чудесы твоими и ко Христу приведеши, блаженне, Емуже и о нас молися непрестанно.

Богородичен: Далече бывше иногда, язычестии народи Рождеством Твоим, Богородице, к Богу приближихомся: Ты бо мене Обожившаго породила еси и древняя клятвы Свободящаго Своею кровию.

Ин канон Николая, глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуясь, Тоя чудеса.

Просвети душу и сердце, молю Ти ся, Светодавче, твари Содетелю, дар подаждь ми воспеванием пети Твоего угодника пречестнаго, имже мир от скорби избави.

Небесную ты обрет премудрость, яко таланта врученнаго, благоупотребил еси: тою бо, разорив противобожную лесть, умудрил еси люди Божественным учением.

Богородичен: Зачинается Превечный, и совершенный обновляется, из Отроковицы Детищ раждается, Егоже проповедал еси во двою существу, во единой же Ипостаси, Богоблаженне.

Катавасия праздника.

Песнь 3

Ирмос: Небеснаго круга Верхотворче, Господи, * и Церкви Зиждителю, * Ты мене утверди в любви Твоей, * желаний краю, верных утверждение, * едине Человеколюбче.

Незлюбивый нравом и кроткий образом, житие имея ангельское, Богоблаженне Николае, не престай о нас моляся единому Человеколюбцу.

Кий град, блаженне, не имеет тебе помощника? Кая ли душа не призывает твоего имени? Или коего места не присещаеш духом, твоими чудесы удивляя вся, Николае?

Барский убо град прият тело твое, но дух твой в Вышнем Иерусалиме, идеже ликуеш со пророки, и апостолы, и святители купно, моляся о нас единому Человеколюбцу.

Богородичен: Просвещение ми испроси, Пречистая Владычице, омраченному грехи многими, порождающая Свет всему миру, и страстную мглу далече отжени, едина Богоблаженная.

Ин

Ирмос: Твоя песнословцы, Богородице, * живый и независтный Источниче, * лик себе совокупльшия, духовно утверди, * в Божественней Твоей славе * венцев славы сподоби.

Печальнии ты обретохом крепкое утешение, помраченнии – свет, и злых изменение иже скорбьми одержимии, священнейший отче.

Святителю Николае, Божия уста быв, из уст волка неприязненна люди избавил еси, славне, и привел еси Творцу дар, даый исцеление всем.

Богородичен: Един родитися изволи плотию из Тебе, выше слова сый Слово, Богомати Пречистая, избравый слугу Себе и учителя народом иерарха Николая.

Кондак праздника, и икос.

И седален святителя, глас 1.

Подобен: Гроб Твой:

Пренесение твоих честных мощей положение нам бысть празднества светла, * святителю Господень прехвальный, * еже хвалим благочестно, и радостно чтуще ты света незаходимаго Солнца, * верным доброто, Николае.

Слава, и ныне, праздника.

Песнь 4

Ирмос: Всел еси на кони, апостолы Твоя, Господи, * и приял еси рукама Твоима узды их, * и спасение бысть еждение Твое верно поющим: * слава силе Твоей, Господи.

Светом Вышнего озаряемь, святителю, мое сердце просвети и тьму греховную отжени, да, радуясь, пою твое святое пренесение.

Возступль на лествицу добродетелей, блаженне, чудотворец явился еси по всей земли, Николае, и сего ради от Мир барстии людие приемлют святыя мощи твоя.

Иереи вернии о тебе хвалятся, и людие христолюбивии призывают тя, во бранех помощника, и мы, недостойнии, подвизаем тя к Богу за ны молитися, Николае.

Богородичен: Чины ангельския удивляет, Богородице, тайны Твоя глубина, бесы же смущает Твоя икона. Ейже мы кланяемся, чтуще Тя, Божию Матерь.

Ин

Ирмос: Неизследный Божий совет, * еже от Девы воплощения Тебе, Вышняго, * пророк Аввакум усмотря, зовяше: * слава силе Твоей, Господи.

Начальна, Богогласе, Света Божия причастием вторый явился еси, сиянием просвещающ мрачныя, яко рачитель добродетели, преизящен славою.

Избави стадо твое от греховныя бури, бед же и волн противных, вводя ны присно к пристанищем безволненным, спасительными твоими молитвами.

Богородичен: Естеством несказанно Вышнего Света, милосердием пребогатаго рождающая неизреченно, обнищавшия ны, Пречистая, Божиими дары обогати.

Песнь 5

Ирмос: Мрак души моя разжени, Светодавче Христе Боже, * началородную тьму изгнав бездны, * и даруй ми свет повелений Твоих, Слове, * да, утренюя, славлю Тя.

В Мирех престол имел еси, в Бар тело преселил еси, и духом на Небеси пребываеши, святителю Николае, со апостолы, яко преемник, с нимиже о нас моли, поющих твое пренесение.

Всех христиан надеждо, и обидимых велий заступниче, и болящих целителю, печальных утешителю и к Богу от человек ходатаю, отечеству нашему мир испроси и спасай ны от поганых нахождения.

Погруженную душу мою многими страстьми, Николае, умерщвленную грехопадением, оживи твоими молитвами и направи на покаяние, да с верными всеми твое славлю пренесение.

Богородичен: Егоже тьмы ангельския и серафимская множества ужаются и разумная тварь трепещет, Того яко Младенца, Дево, питаеши, Егоже образно на руку Твоею видяще, всегда покланяемся.

Ин

Ирмос: Ужасошася всяческая * о Божественней славе Твоей; * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Многим чудотворением красне нозе стяжав, всем благая благовестил еси, от вражды ветхия свободны творя Божественным учением, спаси ны, священноначальниче.

Бога благоволением на хребет морской всед и со благоговейными мужи многу пучину прешед, ко граду Барску пришел еси, блаженне Николае.

Богородичен: Щит верным, Божия Мати Дево, Тя воистинну славим, ангельски зовуще Ти: радуйся, Благословенная и Благодатная, слышание и глаголение страшно и дивно покоище Владыце твари всякия.

Песнь 6

Ирмос: Якоже пророка избавил еси * из глубины преисподния, Христе Боже, * и мене от грехов моих избави, яко Человеколюбец, * и управи живот мой, молюся.

Яко от окрина, от Божественныя твоя церкви нескудно приемлем здравие телесем и душам очищение, святителю Николае, чудеса бо точиши благодатию несомненною верою уповающим на тя.

От напастей различных, и бед лютых, и скорбей, одержащих ны, и от различных злых, отче, яко Христов угодник преславный, избави рабы твоя, достождно чтущия твое святое пренесение.

Греховным мразом истерп и житейским ветром пореваемь, яко другое солнце, отче, подобие твоего образа видево, твоими молитвами да согрееюся, служителю Христов Николае.

Богородичен: Земных ум Небесныя тайны не увести, ни тварь Творца разума домыслится: преходит бо ум человек от Девы рождество Господне. Ейже молящися верою, грехов прощение приимем.

Ин

Ирмос: Божественное сие и всечестное * совершающе празднество, * Богомудрии, Богоматере, * приидите, руками восплещим, * от Нея рождашагося Бога славим.

Люди Божия ко спасению устройвый во плоти Явльшагося многия ради благодати, проповедниче Николае и язык учителю, спаси ны наставлением твоим.

Имевый путь море и стези воды, умоли у Господа, еже нам море житейское преплыти без вреда и стезею вод слезных достигнути Царствие Небесное.

Богородичен: Ты дверь Царя Небес и храм славы Его, Дево Всепетая, отверзи нам двери милосердия и введи ны молитвами Твоими в жилища Небесныя славы.

Кондак, глас 3.

Подобен: Дева днесь:

Взыдоша, яко звезда, от востока до запада * твоя мощи, святителю Николае, * море же освятися шествием твоим, * и град Барский приемлет тобою благодать: * нас бо дея явился еси чудотворец изящный, * предивный и милостивый.

Икос: Воспоим ныне святителя песньми, Мирским людем пастыря и учителя, да молитвами его просветимся: сей бо явился чист весь, нетленен духом, Христу принося жертву непорочну, чисту, Богу благоприятну, яко святитель, очищен и душею и телом. Темже сый истинно Церкви предстатель и поборник сея и чудотворец изящен, предивен и милостив.

Песнь 7

Ирмос: На поле Деире * иногда мучитель печь постави на мучение Богоносных, * в нейже три отроки песнословяху Единого Бога, * троично воспеваху, глаголюще: * отцев Боже, благословен еси.

Днесь радуются Ангели Божии, рыдает же демонское множество: спасл бо еси люди от напасти и отгнал еси духи темныя. Тем достойно одолевый нарицаешися. Сего ради вопием Господеви: отец наших Боже, благословен еси.

Одержимии печалию немощи, различными недузи утрудени, с верою к раце твоей влекутся и, получивше твою милость, быстрообразно отходят, радостно Господеви поюще: отец наших Боже, благословен еси.

Предстоят ти, блаженне, собори правоверных людей, и хвалятся о тебе церковнии учителя, прославляют же тя цари, яко заступника. Мы же ти молимся, спаси ны, Николае, поющия Господеви: отец наших Боже, благословен еси.

Богородичен: О, како, Спаса моего воспою, Егоже трепетно хвалят Ангели? Но Ты, Мати, настави мя и милосердие Сыновнее благоутробием Твоим понуди помилovati ны, на Тя уповающия, яко Ты, за ны молящи Его, от муки избавиши.

Ин

Ирмос: Не послужиша твари Богомудрии, * паче Создавшаго, * но, огненное прещение мужески поправше, * радовахуся, поюще: * препетый отцев Господь и Бог, благословен еси.

Вещей суетством всему уму человеческому обуявшу, яко солию, даждь цельбу словом твоим и пети Господеви научи: препетый отцев Господь и Бог, благословен еси.

О, преславная твоя чудеса, яже сотворил еси! Недуги бо исцеляеши и бед избавляеши, всем вопити повелевая Господеви: препетый отец наших Боже, благословен еси.

Богородичен: Нашему смирению Заступница и стена, Богородительнице Чистая, Ты еси. Иже раби Твои суще, всегда вопием Господеви: препетый отец наших Боже, благословен еси.

Песнь 8

Ирмос: Ангели и Небеса, * на престоле славы сидящаго и яко Бога непрестанно славимаго * благословите, пойте * и превозносите Его во веки.

Ангели Небес яко служителя тя восприемлют, пророцы и апостоли яко клеветы сретают, Сам Господь тебе восприемлет, мы же, грешнии, милости просим.

Велика власть от Бога вдана ти есть, Николае: море повинуется, воздух слушает, и языцы покарятся, видяще преславная твоя чудеса.

Новому Израилю, христианскому народу, Спасе, славнейши Моисея показал еси Твоего святителя Николая, от всех зол нас избавляюща.

Богородичен: Очищение грехов яко Мати Божия испроси и руку ми прости, Госпоже, погруженному во глубине нечаяния, да, надеждою востав, превозношаю Тя во веки вся.

Ин

Ирмос: Отроки благочестивыя в печи * Рождество Богородичо спасло есть, * тогда убо образуемое, * ныне же действующее, * вселенную всю воздвизает пети Тебе: * Господа пойте, дела, * и превозносите Его во вся веки.

Возрасл еси, яко цвет благоуханен, мирския земли, славне, всем принося благоуханныя вони, целебныя дары хвалящим тя и поющим: Господа воспевайте дела, и превозносите Его во вся веки.

Искапавый Божия благодати сладость, яко гора масличная елей, море имел еси путь, безбедствен благодатию Господа, Емуже сладце зовем: Господа воспевайте дела, и превозносите Его во вся веки.

Богородичен: Ликов премирных со удивлением раждаеши и пребываеши присно Дева: Слово бо родила еси, Человека бывша непреложна Божеством, Емуже вси поем: Господа воспевайте дела, и превозносите Его во вся веки.

Песнь 9

Ирмос: Благословен Господь Бог Израилев, * воздвигнувый рог спасения нам * в дому Давидове, отрока Своего, * в нихже посети нас Восток с высоты * и направил ны есть на путь мира.

Благословен Господь Бог наш, яко прослави святителя во странах, чудес струи испускающа, в Мирех и в латинех вся исцеляюща и в России милостивно посещающа.

Честным сном уснул еси и тело в Бар пользы ради пустил еси, неусыпный быв заступник всем, верою призывающим тя, молитвами твоими, Николае.

Троицен: Благословен Небесе и земли Творец, Бог Вседержитель, Отец Безначальный и Всесильный, и Сын прежде век, от недр отрыгнутое Слово, Имже вся быша, яже о нас, и Дух исходяй Святыи, Троице Святая, слава Тебе.

Богородичен: Извितिю словес по достоянию Тя похвалити не достизаю, Небесных сил пребольшу и твари всея Честнейшу, Бога и Творца порождшую плотию. Егоже моли, Богородице, да помилует ны в День судный.

Ин

Ирмос: Всяк земнородный * да възграется, духом просвещаеть, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная Богородице, * Чистая Приснодево.

Память твоя днесъ приносит празднество, апостольский лик и мученический собор радуется и праведнии души, вернии же тя песньми славим, вопиюще: от всех скорбей, святителю Христов, избави ны.

Преславная память твоя нам возсия, светло просвещаючи верныя, святителю Христов Николае мудре. Темже молим тя: помяни всех нас и от противныя напасти всякия молитвами твоими избави.

Богородичен: Умертви наша плотския страсти и похоти, Богородительнице Чистая, устави и страстей наших бурю, утоли волнение помыслов, укрепи, Благословенная Пречистая, сердца верно чтущих Тя, Заступницу.

Светилен.

Подобен: Жены, услышите:

Велика чудеса твоя, пресвятый Николае, * яко явился еси во сне богомудрому Константину * и три воины спасл еси, без вины на смерть осужденныя. * Тако и нас спаси от напрасныя и вечныя смерти, * пресвятый Николае, святителю Господень.

Слава, и ныне, праздника.

На хвалитех стихиры на 4, глас 1. Самогласны:

Возрев неуклонно на высоту разума * и узрев неявляюща премудрости глубину, * учении мир обогатил еси, отче. * О нас присно молися Христу, * святителю Николае.

Человече Божий, и верный угодниче, * и строителю Того таин, * и мужу желаний духовных, * столпе одушевленный и вдохновенный образ, * яко Божественное бо сокровище, * тя Мирская Церковь, чудящися, прияла есть * и молитвенника о душах наших.

Глас 2:

Правило веры и образ кротости * яви тебе стаду твоему Христос Бог, * святителю Николае, * в Мирех убо благоухающе ти * всюду сияют светло Божественная твоя исправления, * сирых и вдовиц предстателю. * Темже молися непрестанно * спасти души наша.

Отче Николае, * мироположница мощей твоих Миры обогащает, * в нихже и связанныя неправедно осужденныя, * во сне царю явлься, * и твоим явлением свободил еси от смерти, и уз, и темницы, * но и ныне, якоже тогда, * и присно явлением твоим явися, * моляй о душах наших.

Слава, глас 5:

Вострубим трубою песней, * възграем празднественная и ликовствуем, радующеся, * в молебное торжество Богоноснаго отца, * цари и князи да стекутся, *

иже сонным страшным явлением царя премирающа * невинно держимыя три отпустить воеводы да воспоют; * пастыри и учителя, * Доброму Пастырю подобноревнительна пастыря, * сошедшеся, восхвалим; * иже в недужех – врача, в бедах – избавителя, * грешнии – заступника, нищии – сокровище * и иже в скорбех – утешителя, * спутника – путешествующии, * на мори сущии – правителя * и вси везде тепле предваряюща. * Великаго святителя * восхваляюще, сице рцем: * пресвятыи Николае, предвари, и избави нас от настоящих бед, * и спаси стадо твое молитвами твоими.

И ныне, праздника.

По Трисвятом тропарь святого. Слава, и ныне, праздника. Славословие великое. Ектении и отпуст. Знаменуются же братия святым елеем от кандила святого. И час 1-й, и конечный отпуст.

НА ЛИТУРГИИ

Блаженны: от канона праздника, песнь рядовая и святого песнь 3-я, на 4.

Незлобивый нравом и кроткий образом, житие имея ангельское, Богоблаженне Николае, не престай о нас моляся единому Человеколюбцу.

Кий град, блаженне, не имеет тебе помощника? Кая ли душа не призывает твоего имени? Или коего места не присещаеши духом, твоими чудеса удивляя вся, Николае?

Слава: Барский убо град прият тело твое, но дух твой в Вышнем Иерусалиме, идеже ликуеши со пророки, и апостолы, и святители купно, моляся о нас единому Человеколюбцу.

И ныне: Богородичен: Просвещение ми испроси, Пречистая Владычице, омраченному грехи многими, породжающая Свет всему миру, и страстную мглу далече отжени, едина Богоблаженная.

Тропарь святого, глас 4:

Приспе день светлаго торжества, * град Барский радуется, * и с ним вселенная вся ликовствует * песнями и пеньми духовными: * днесь бо священное торжество * в пренесение честных и многоцелебных мощей * святителя и чудотворца Николая, * якоже солнце незаходимое, возсия светозарными лучами, * разгоняя тьму искушений же и бед * от вопиющих верно: * спасай нас, яко предстатель наш великий, Николае.

Ин тропарь святого, глас тойже:

Отечество свое, Миры Ликийския, не оставь духом, * во премирный град Барский преславно телом пренесеся, архиерею Николае. * И отуду множество человеческое своим пришествием возвеселил еси * и болящия исцелил еси. * Темже ты молим, святителю Николае, * моли Христа Бога, * да спасет души наша.

Кондак святого, глас 3.

Взыдоша, яко звезда, от востока до запада * твоя мощи, святителю Николае, * море же освятися шествием твоим, * и град Барский приемлет тобою благодать: * нас бо дея явился еси чудотворец изящный, * предивный и милостивый.

Прокимен, глас 7: Восхвалятся преподобнии во славе * и возрадуются на ложах своих.

Стих: Воспойте Господеви песнь нову, яко дивна сотвори Господь.

Апостол ко Евреям, зачало 335,

Братие, повинуйтеся наставником вашим и покаяйтесь, тии бо бдят о душах ваших, яко слово воздати хотяще, да с радостию сие творят, а не воздыхающе, несть бо полезно вам сие. Молитесь о нас, уповаем бо, яко добру совесть имамы, во всем добре хотяще жити. Лишше же молю, сие творите, да вскоре устроюся вам. Бог же мира, возведый из мертвых Пастыря овцам великаго, кровию завета вечнаго, Господа нашего Иисуса Христа, да совершит вы во всяком деле блазе, сотворити волю Его, творя в вас благоугодное пред Ним, Иисус Христом. Ему же слава во веки веков. Аминь.

Аллилуия, глас 2: Священницы Твои облечутся в правду, и преподобнии Твои возрадуются.

Евангелие от Луки зачало 24.

Во время оно, ста Иисус на месте равне, и народ ученик Его, и множество много людей от всея Иудей и Иерусалима, и помория Тирска и Сидонска, иже приидоша послушати Его и исцелитися от недуг своих, и страждущии от дух нечистых, и исцеляхуся. И весь народ искаше прикастися Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтеся в той день и възиграйте, се бо мзда ваша многа на небеси.

Причастен: В память вечную:

Молитва

О всехвальный и всечестный архиерею, великий чудотворче, святителю Христов, отче Николае, человеце Божий и верный рабе, мужу желаний, сосуде избранный, крепкий столпе церковный, светильниче пресветлый, звездо осиявающая и освещающая всю вселенную. Ты еси праведник, яко финик процветший, насажденный во дворех Господа своего, живой в Мирех, миром благоухал еси и миро приснотекущее благодати Божия источаяй. Твоим шествием, пресвятыи отче, море освятися, егда многочисленныя твоя мощи шествоваху во град Барский, от востока до запада хвалити имя Господне. О преизящный и предивный чудотворче, скорый помощниче, теплый заступниче, пастырю предобрый, спасающий словесное стадо от всяких бед! Тебе прославляем и тебе величаем, яко надежду всех христиан, источника чудес, защитителя верных премудраго учителя, алчущих кормителя, плачущих веселие, нагих одеяние, болящих врача, по морю плавающих управителя, пленников свободителя, вдов и сирот питателя и заступника, целомудрия хранителя, младенцев кроткаго наказателя, старых укрепление, постников наставника, труждающихся упокоение, нищих и убогих изобильное богатство. Услыши нас, молящихся тебе и прибегающих под кров твой, яви предстательство твое о нас к Вышнему и исходатайствуй твоими богоприятными молитвами вся полезная ко спасению душ и телес наших: сохрани святую обитель сию (или храм сей), всякий град и весь, и всякую страну христианскую, и люди живущия от всякаго озлобления помощью твоею, вемы бо, вемы, яко много может молитва праведнаго, поспешествующая во благое; тебе же праведнаго, по Препоблагословенней Деве Марии, предстателя ко Всемилостивому Богу имамы, и к твоему, преблагий отче, теплому ходатайству и заступлению смиренно притекаем: ты нас соблюди, яко бодрый и добрый пастырь, от всяких врагов, губительства, труса, града, глада, потопа, огня, меча, нашествия иноплеменников, и во всяких бедах и скорбех наших подавай нам руку помощи, и отверзи двери милосердия Божия: понеже недостойни есмы зрети высоту небесную, от множества неправд наших, связаны узами греховными, и николиже воли Создателя нашего сотворихом, ни сохранихом повелений Его. Темже преклоняем колена сокрушенна и смиренна

сердца нашего к Зиждителю своему, и твоего отеческаго заступления к Нему просим: помози нам, угодниче Божий, да не погибнем со беззаконии нашими, избави нас от всякаго зла и от всякия вещи сопротивныя, управи ум наш и укрепи сердце наше в правой вере, в нейже твоим предстательством и ходатайством, ни ранами, ни прещением, ни мором, ни коим гневом от Создателя своего умалени будем, но мирное zde поживем житие и да сподобимся видети благая на земли живых, славяще Отца и Сына и Святаго Духа, Единого в Троице славимаго Бога и покланяемаго, ныне, и присно, и во веки веков. Аминь.